



Hora 11,45 praeses disceptationem interruptit et secretarius generalis ex ambone communicavit schema *de Ecclesia* distributum iri exeunte illa hebdomada vel proxima ineunte. Item communicavit exitum suffragationis peractae.

Continuata est deinde disceptatio et ex ordine locuti sunt Gabriel Manek, arch. Endehenus, Albertus Soegijapranata, arch. Semarangensis, Casimirus Morcillo González, arch. Caesaraugustanus.

Hora 12,15 repositus est S. Evangelii codex. Secretarius generalis in memoriam revocavit die subsequenti celebratum iri Consistorium, hora 9,30. Recitatis precibus *Angelus...* et *Agimus...* secretarius generalis intimavit proximam congregationem generalem, die 16 novembris habendam, et Patres dimissi sunt.

XX

Congregatio generalis vicesima habita est die 16 novembris, feria VI, hora 9 matutina. Interfuerunt 2213 Patres, nempe 67 cardinales, 6 patriarchae, 9 primates, 395 archiepiscopi, 1628 episcopi, 10 abbates nullius, 10 praelati nullius, 88 superiores generales.

Missa celebrata est ritu armeno a P. D. Georgio Layek, arch. Aleppensi Armenorum in Syria, Chorus Pontificii Collegii Armeni exsecutus est cantus proprii ritus. Antea Patribus distributum fuerat folium cui titulus: *Ordo Sacrae Liturgiae Ritus Armeni*, continens eiusdem Liturgiae notulam historicam et prospectum.

Missa expleta, secretarius generalis intimavit: *Exeant omnes*, et P. D. Paulus Kiredjian, arch. Constantinopolitanus Armenorum, S. Evangelii codicem super paratum thronum statuit.

Card. Achilles Liénart, ep. Insulensis, munere primi praesidis fungens, precem *Adsumus...* recitavit, et secretarius generalis ex ambone, proclamato nomine praesidis congregationis, annuntiavit distributas fore, durante congregatione, emendationes circa prooemium constitutionis *de sacra Liturgia*, die subsequenti suffragationi subiiciendas.

Praeses, post monitionem de momento disceptationis circa revelationis fontes, ex ordine ad loquendum vocavit: cardd. Eugenium Tisserant, ep. Portuensem et S. Rufinae, Emmanuelem Gonçalves Cerejeira, patr. Lisbonensem, Iacobum de Barros Câmara, arch. S. Sebastiani Fluminis Ianuarii, Iacobum McIntyre, arch. Angelorum in California, Antonium Caggiano, arch. Bonaërensem, Ioseph Lefebvre, arch. Bituricensem, Rufinum Santos, arch. Manilensem, Ioannem Urbani, patr. Venetiarum, Radulfum Silva Henriquez, arch. S. Iacobi in Chile, Michaellem Browne; Armandum Fares, arch. Catacensem et ep. Squillacensem, Alfredum



Bensch, arch. Berolinensem, Arturum Tabera Araoz, ep. Albacetensem, Ioseph Reuss, ep. tit. Sinopensem, aux. Moguntinum, Ioseph Gargitter, ep. Brixinensem, Simonem Hoa Nguyen-van-Hien, ep. Dalatensem, Ioseph Battaglia, ep. Faventinum, Aemilium Guerry, arch. Cameracensem, Hermenegildum Florit, arch. Florentinum, Iesum Alba Palacios, ep. Tehuantepecensem, Christophorum Butler, abb. praesidem Congr. Anglicae O.S.B.

Patribus distributum est folium typis impressum, continens emendationes prooemii schematis *de sacra Liturgia*.

Hora 12,25 reposito S. Evangelii codice, praeses *Angelus... Agimus...* recitavit, et secretarius generalis proximam congregationem generalem, die 17 novembris habendam, intimavit.

XXI

Congregatio generalis vicesima prima habita est sabbato, die 17 novembris, hora 9 ante meridiem. Interfuerunt 2207 Patres, nempe 69 cardinales, 7 patriarchae, 9 primates, 397 archiepiscopi, 1617 episcopi, 10 abbates nullius, 10 praelati nullius, 88 superiores generales.

Missam de Spiritu Sancto celebravit P. D. Antonius Baraniak, arch. Posnaniensis. Chorus Cappellae Sixinae exsecutus est cantus: *Aurora lucem provehit; O salutaris hostia; Panis angelicus*.

Missa expleta, secretarius generalis intimavit: *Exeant omnes*, et P. D. Laurentius Bianchi, ep. Sciamchiensis, S. Evangelii codicem super paratum thronum statuit.

Card. Normannus Gilroy, arch. Sydneyensis, munere primi praesidis fungens, precem *Adsumus...* recitavit.

Secretarius generalis, proclamato nomine praesidis congregationis, nomina significavit eorum, qui *de fontibus revelationis* loqui petierant. Dein quatuor emendationum textum legit, quae suffragationi subiiciendae erant.

Card. Iacobus Lercaro et Ioseph Martin, ep. Nicoletanus, relationes de emendationibus fecerunt. Dein secretarius generalis notificavit praesidem statuisse super quatuor puncta distincte suffragationes faciendas esse per *placet* vel *non placet*.

Disceptatio prosecuta est et ad loquendum *de fontibus revelationis* ex ordine vocati sunt: cardd. Carolus de la Torre, arch. Quitensis, Ioseph Garibi y Rivera, arch. Guadalajarensis, Iulius Döpfner, arch. Monacensis et Frisingensis, Aloisius Concha, arch. Bogotensis, Antonius Bacci; Paulus Schmitt, ep. Metensis, card. Alfredus Ottaviani.